

# **Tehnička specifikacija za izradu online platforme za prezentaciju informacija i rezultata praćenja rada javnih institucija, političkih stranaka i javnih zvaničnika u cilju identifikacije potencijalnih korupcijskih rizika**

## **1. Opis platforme**

Platforma koju je potrebno razviti će prikazivati podatke koje organizacije civilnog društva koje saraduju na ovom projektu sakupljaju ili će sakupljati o akterima političkog života u BiH, a sa ciljem da se javnosti približe različiti aspekti odgovornosti pojedinaca i pojedinki, ali i političkih partija u BiH.

Projekat “Platforma odgovornosti” zajednički implementiraju Transparency International u Bosni i Hercegovini (TI BiH), Udruženje “Zašto ne” i Balkanska mreža istraživačkog novinarstva u Bosni i Hercegovini (BIRN BiH), a isti se temelji na ideji stvaranja koordiniranog i sveobuhvatnog nadzornog mehanizma koji okuplja različite organizacije i alate radi nadzora nad institucijama, nosiocima javnih funkcija i procesima donošenja odluka.

Jedinstvena platforma “odgovorno.st” će građanima pružiti informacije o nivou integriteta i aktivnostima donosioca odluka, ali će takođe pružiti alate za otkrivanje rizika od korupcije. Kroz ovakav nadzor će držati nosioce javnih funkcija i institucije odgovornima za javnu potrošnju, ispunjenje njihovih obećanja, podršku reformama protiv korupcije, nivo njihove otvorenosti, finansijsku odgovornost i sve identifikovane nepravilnosti.

## **2. Osnovne funkcionalnosti**

Platforma treba imati sljedeće funkcionalnosti, koje će detaljnije biti definirane i dopunjene u fazama pripreme detaljnih zahtjeva za platformu:

- Sumarne izvještaje koji se automatski generiraju od prikupljenih podataka u formi tabela, grafova, listi i slično – ovi izvještaji će biti automatizovani na stranici i prikazivati najzanimljivije podatke koji bi se prezentirali javnosti, uglavnom bi trebali biti na home pageu, ali će biti postavljani i na druga mjesta u platformi. To mogu biti ili direktno podaci iz baze podataka koja će biti dio platforme ili neko jednostavno sumiranje tih podataka u vidu procenata, zbirova, poređenja ili slično;
- Dio platforme za tekstove, istraživanja, vijesti i slične sadržaje koji će biti proizvedeni kroz implementaciju projekta – potrebno je napraviti neku blog-like funkcionalnost na platformi, eventualno organizovanu u više rubrika što će biti definirano tokom procesa izrade, koja bi se koristila za objavljivanje različitih sadržaja kroz implementaciju projekta;
- Statične dijelove platforme sa informacijama o projektu, partnerima i slično – standardne statične rubrike kojima bi se pristupalo sa home page-a platforme;
- Prikaz skupljenih informacija o pojedinim akterima na organizovan način – institucije, političke partije, pojedinci/pojedinke – svaki akter bi imao svoju stranicu organizovanu kao kartica tog aktera gdje bi bili na jednom mjestu prikazani svi osnovni podaci o tom akteru. Svi podaci koje prikazuju ove stranice će biti prikupljeni u bazi podataka koja će biti dio ove platforme, a u koju će podatke

unositi istraživači angažovani na projektu ili će se kupiti iz već postojećih baza partnerskih organizacija;

- Mogućnosti interakcije građana sa platformom u formi komentara, like/dislike pojedinih sadržaja, slanja upita i sl. – ova gamifikacija platforme bi se dešavala na različitim mjestima u platformi, gdje bi u nekim slučajevima neke od akcija mogli raditi samo registrovani korisnici;
- Mogućnost dijeljenja sadržaja na društvenim mrežama, kao i drugim platformama (widgeti);
- Back-end administratorski dio platforme gdje će se moći administrirati cijela platforma na siguran i jednostavan način.

### 3. Podaci koji se prikupljaju

Budući da će centralni dio projekta biti podaci koje prikupljaju projektni partneri, ovdje ćemo navesti koji bi podaci trebali da budu na kraju dio platforme (finalna lista vrste podataka i finalnih polja za baze podataka će biti definirana u toku kreiranja plana za razvoj platforme, ovo služi samo za procjenu količine posla na kreiranju platforme):

- Praćenje na nivou javnih institucija
  - o Svaka institucija će imati osnovne podatke: naziv institucije, kratki opis, rukovodeća osoba/osobe
  - o Praćenje ključnih prioriteta u borbi protiv korupcije, vladavine prava i međunarodnih preporuka – ovo će biti u formi pregleda zakonodavstva i zakonodavnih i drugih akcija koje su provedene na ovom polju uz označavanje nivoa napretka za svaku od njih (**Naziv aktivnosti/zakona, kratak opis, ocjena napretka**)
  - o Praćenje sprovođenja programa, akcionih planova i strateškog okvira protiv korupcije – ovdje će se pratiti mjere i obećanja iz programa, strategija i akcionih planova institucija, te će im se dodjeljivati ocjene (**naziv mjere/obećanja, ocjene, postotak ispunjenosti**)
  - o Mjerenje institucionalne otvorenosti i transparentnosti – ovdje će se pratiti otvorenost i transparentnost institucija uz procentualnu vrijednost otvorenosti institucije kao finalni rezultat (**naziv institucije, procenat ispunjenosti**)
  - o Finansijska odgovornost u raspodjeli javnih sredstava, javnim nabavkama i reviziji poslovanja – ovdje će biti nekoliko različitih aspekata praćenja (revizija institucija, javne nabavke i raspodjela javnih sredstava), a finalni rezultati će biti u formi **primjera potencijalnih nepravilnosti, primjera primjedbi, pregleda iznosa javnih donacija ili nabavki**, kao i **ukupne ocjene odgovornosti** u ovim procesima institucije
- Praćenje na nivou političkih partija
  - o Svaka partija će imati osnovne podatke u bazi: Naziv partije, godina osnivanja, parlamenti u kojima je dio, učešće u vlasti, predsjednik
  - o Analiza programa stranaka sa posebnim fokusom na prioritetima u borbi protiv korupcije i vladavine prava (**naziv obećanja, ocjena**)
  - o Analiza i ocjenjivanje internih mehanizama integriteta političkih stranaka – ovdje će se podaci uglavnom bazirati na check-listama, te ocjene integriteta (**check-liste, ocjena integriteta**)

- Praćenje finansiranja političkih stranaka (**primjeri povreda, ocjena transparentnosti finansiranja**)
- Praćenje na nivou pojedinaca/pojedinki
  - Svaki pojedinac/ka će imati osnovne podatke: ime i prezime, trenutna funkcija, datum stupanja na funkciju, institucija
  - Analiza stepena ispunjenja obećanja javnih funkcionera i istinitost izjava – ovdje će se pratiti redovno obećanja i izjave funkcionera prema dosljednosti i istinitosti (**obećanje, ocjena ispunjenosti**), (**izjava, ocjena dosljednosti ili istinitosti**)
  - Praćenje potencijalnih sukoba interesa i akumulacije pozicija – ovdje će se evidentirati sve funkcije i udjeli/vlasništvo u kompanijama, te dodjeljivati nivo rizika sukoba interesa i akumulacije pozicija (**funkcije, udjeli/vlasništvo, nivo rizika**)
  - Praćenje angažovanja u anti-korupcionim inicijativama, odluka o pitanjima vezanim za borbu protiv korupcije (**tekstualna evaluacija, ocjena postojanja planova integriteta, ocjena postojanja javno dostupnih mehanizama prijave korupcije**)
  - Praćenje potencijalnog uključenja u korupciju ili druge nepravilnosti (**linkovi na tekstove**)

#### 4. Prikupljanje podataka

Podatke će trebati prikupljati na dva načina – jedan je kroz kreiranje baze podataka sa pripadajućom administracijom iste koje bi bila sigurna i jednostavna za korištenje, a preko koje bi se unosili podaci koje bi prikupljali istraživači tokom procesa, a drugi je putem automatskog prikupljanja podataka sa platformi partnera na projektu.

U fazi izrade detaljnog plana implementacije je potrebno razviti plan prikupljanja podataka i održivosti ovog mehanizma.

#### 5. Vizuelni identitet i dizajn

Potrebno je kreirati i vizuelni identitet i dizajn platforme koji treba odgovarati temi platforme i njenim funkcionalnostima, kao i ciljanim skupinama platforme. On treba da uključi prijedloge loga platforme, fontova, palete boja, dizajn glavne stranice, kao i svih podstranica platforme.

#### 6. Dokumentacija

Potrebno je dostaviti kompletnu dokumentaciju koja sadrži detaljan source kod (dokumentovan), kao i uputstva za korištenje platforme. Također, minimalno održavanje platforme u periodu od 2 godine je obavezno.

#### 7. Optimizacija platforme

Platforma mora da je optimizirana i prilagođena svim pretraživačima, kao i uređajima sa kojih joj se može pristupati. Isto tako, potrebno je napraviti SEO optimizaciju i indeksiranje sadržaja za sve pretraživače.